

宮闈典第一百二十八卷

宦寺部列傳三

北齊 韓寶業

按北史恩幸傳齊諸宦者韓寶業盧勒又齊紹泰子徵並神武舊左右唯閤內驅使不被恩遇歷天保皇建之朝亦不至寵幸但漸有職任寶業至長秋卿勒又等或爲中常侍武成時有曹文擢夏侯通伊長游魯侍伯郭沙彌鄧長顥及寶業輩亦有至儀同食幹者唯長顥武平中任參宰相干預朝權如寶業及勒又齊紹子徵後並封王俱自收斂不過侵暴又有陳德信亦參時宰與長顥並開府封王俱爲侍中左右光祿大夫領侍中又有潘師子崔孝禮劉萬通研胥光弁劉通遠王弘遠王子立王元昌高伯華左君才能純陋宮鍾馗趙野又徐世凝荀子溢斛子慎宋元寶康德汪並於後主之朝肆其姦佞敗政虐人古今未有多授開府罕止儀同亦有加光祿大夫金章紫綬者多帶甲侍中中常侍此二職乃至數十人恒出入門禁往來園苑趨侍左右通宵累日承候顏色競進諛諛發言動意多會深旨一戲之賞動逾巨萬丘山之積貪恡無厭猶以波斯狗爲儀同郡君分其幹祿神

獸門外有朝貴憩息之所時人號爲解卸廳諸閤或在內多日暫放歸休所乘之馬牽至神獸門階然後升騎飛鞭競走十數爲羣馬塵必至諸貴爰至唐趙韓駱皆隱廳趨避不敢爲言齊盧陳鄧之徒亦意屬尙書卿尹宰相旣不爲致言時主亦無此命唯以工巧矜功用長顙爲太府卿焉

田鵬鸞

按顏氏家訓齊有宦者內參田鵬鸞本蠻人也年十四五初爲闍寺便知好學懷袖握書曉夕諷誦所居卑末使役苦辛時伺閒隙周章詢請每坐文林館氣喘汗流問書之外不假他語及覩古人節義之事未嘗不感激沉吟久之吾甚憐愛倍加開獎後被賞遇賜名敬宣位至侍中開府後主之奔青州遣其西出參伺動靜爲周軍所獲問齊王何在給云已去計當出境疑其不信毆捶服之每折一支辭色愈厲竟斷四體而卒蠻戶童叟猶能以學成忠齊之將相比敬宣之奴不若也

唐 楊思勛

按唐書宦者傳思勛羅州石城人本蘇氏冒所養姓少給事內侍省從元宗討內難擢左監門衛將軍帝倚爲爪牙開元初安南蠻渠梅叔鸞叛號黑帝舉三十二州之衆外結林邑真臘金鄰等國據

海南衆號四十萬思勛請行詔募首領子弟十萬與安南大都護光楚客繇馬援故道出不意賊駭
貽不暇謀遂大敗封尸爲京觀而還十二年五溪首領覃行章亂詔思勛爲黔中招討使率兵六萬
往執行章斬首三萬級以功進輔國大將軍給祿俸防閤從封泰山進驃騎大將軍封虢國公邕州
封陵獠梁大海反破賓橫等州思勛又平之禽大海等三千人討斬支黨皆盡瀧州蠻陳行範自稱
天子其下何游魯號定國大將軍馮璘南越王破州縣四十詔思勛發永道連三州兵淮南弩士十
萬襲斬游魯璘於陣行範走盤遼諸洞思勛悉衆窮追生縛之阮其黨六萬獲馬金銀鉅萬計卒年
八十餘思勛鷺忍敢殺戮所得俘必剝面髻腦禿髮皮以示人將士憚服莫敢視以是能立功內給
事牛仙童納張守珪賂詔付思勛殺之思勛縛於格筆慘不可勝乃探心截手足剔肉以食肉盡乃
得死楚客者樂安人後歷桂州都督致仕封松滋縣侯 按舊唐書宦官傳思勛以奄從事內侍
省預計李多祚功超拜銀青光祿大夫行內常侍思勛有膂力殘忍好殺從臨淄王誅韋氏遂從王
爲爪士累遷右監門衛將軍開元二十八年卒

高力士

按唐書宦者傳力士馮盎曾孫也聖曆初嶺南討擊使李千里上二閼兒曰金剛曰力士武后以其
疆悟勅給事左右坐累逐出之中人高延福養爲子故冒其姓善武三思歲餘復得入禁中稟食司
宮臺既壯長六尺五寸謹密善傳詔令爲宮闈丞元宗在藩力士傾心附結已平韋氏乃啟屬內坊
擢內給事先天中以誅蕭岑等功爲右監門衛將軍知內侍省事於是四方奏請皆先省後進小事
卽專決雖洗沐未嘗出眠息殿帷中微倖者願一見如天人然帝曰力士當上我寢乃安當是時宇
文融李林甫蓋嘉運韋堅楊慎矜王鉞楊國忠安祿山安思順高仙芝等雖以才寵進然皆厚結力
士故能踵至將相自餘承風附會不可計皆得所欲中人若黎敬仁林昭隱尹鳳翔韓莊牛仙童劉
奉廷王承恩張道斌李大宜朱光輝郭全邊令誠等並內供奉或外監節度軍修功德市鳥獸皆爲
之使使還所稟獲動巨萬計京師甲第池園良田美產占者什六寵與力士略等然悉藉力士左右
輕重乃能然肅宗在東宮兄事力士它王公主呼爲翁戚里諸家尊曰蕃帝或不名而呼將軍力士
幼與母麥相失後嶺南節度使得之瀧州迎還不復記識母曰胸有七黑子在否力士袒示之如言
母出金環曰兒所服者乃相持號慟帝爲封越國夫人而追贈其父廣州大都督延福與妻及力士

貴時故在侍養與麥均金吾大將軍程伯獻約力士爲兄弟後麥亡伯獻纒經受弔河間男子呂元
晤更京師女國姝力士娶之元晤擢刀筆史至少卿子弟仕皆王傳元晤妻死中外贈賻送葬自第
至墓車徒背相望不絕始李林甫牛仙客知帝憚幸東都而京師漕不給乃以賦粟助漕及用和糴
法數年國用稍充帝齋大同殿力士侍帝曰我不出長安且十年海內無事朕將吐納導引以天下
事付林甫若何力士對曰天子順動古制也稅入有常則人不告勞今賦粟充漕臣恐國無旬月蓄
和糴不止則私藏竭逐末者衆又天下柄不可假人威權旣振孰敢議者帝不悅力士頓首自陳心
狂易語謬當死帝爲置酒左右呼萬歲由是還內宅不復事加累驃騎大將軍封渤海郡公於來廷
坊建佛祠興靈坊立道士祠珍樓寶屋國貨所不逮鍾成力士宴公卿一扣鍾納禮錢十萬有佞悅
者至二十扣其少亦不減十都北塢豐列五磴日僦三百斛直有袁思藝者帝亦愛幸然驕倨甚士
大夫疏畏之而力士陰巧得人譽帝初置內侍省監二員秩三品以力士思藝爲之帝幸蜀思藝遂
臣賊而力士從帝進齊國公帝聞肅宗卽位喜曰我兒應天順人改元至德不忘孝乎尙何憂力士
曰兩京失守人流亡河南漢北爲戰區天下痛心而陛下以爲何憂臣不敢聞從上皇還進開府

儀同三司實封戶五百上皇徙西內居十日爲李輔國所誣除籍長流巫州力士方逃瘡功臣閣下輔國以詔召力士趨至閣外遣內養授謫制因曰臣當死已久天子哀憐至今日願一見陛下顏色死不恨輔國不許寶應元年赦還見二帝遺詔北向哭歐血曰大行升遐不得攀梓宮死有餘恨慟而卒年七十九代宗以護衛先帝勞還其官贈揚州大都督陪葬泰陵初太子瑛廢武惠妃方嬖李林甫等皆屬壽王帝以肅宗長意未決居忽忽不食力士曰大家不食亦膳羞不具邪帝曰爾我家老搯我何爲而然力士曰嗣君未定邪推長而立孰敢爭帝曰爾言是也儲位遂定天寶中邊將爭立功帝嘗曰朕春秋高朝廷細務付宰相蕃夷不襲付諸將寧不暇邪對曰臣間至閤門見奏事者言雲南數喪師又北兵悍且疆陛下何以制之臣恐禍成不可禁其指蓋謂祿山帝曰卿勿言朕將圖之十三年秋大雨帝顧左右無人卽曰天方災卿宜言之力士曰自陛下以權假宰相法令不行陰陽失度天下事庸可復安臣之鉗口其時也帝不答明年祿山反力士善揣時事勢候相上下雖親昵至當覆敗不肯爲救力故生平無顯顯大過議者頗恨宇文融以來權利相賊階天下之禍雖有補益弗相除云 按唐郭湜高力士傳高力士於太宗陵寢宮見小梳箱一柞木梳一黑角篋一

草根刷子一歎曰先帝首建義旗新正皇極十有餘載方致昇平隨身服用惟留此物將欲傳示孝孫永存節儉具以奏聞上至陵日山川雷隱草木風生陳千官朝見之儀具九賓宗祀之禮禮畢俯伏流涕若不自勝須臾聞鼓聲四振雲霧朗清萬歲之聲豈惟於遠近一人之孝固通於神明不可得而稱也至寢宮問曰所留示朕者何在力士趨入捧跪上上跪奉肅敬如不可勝曰夜光之珍垂棘之璧將以喻此曾何足言卽命史官書之典冊二十三年後上忽言曰朕親主六合二十餘年兩都往來甚覺勞弊欲久住關內其可致焉三閭羣臣卿士皆云江淮漕運轉輸極難臣等愚蒙未知爲計上不悅後李林甫用紫曜之謀爰興變造牛仙客取彭果之計首建和糴數年之中甚覺寬貸上因大同殿思神念道左右無人謂高公曰朕自住關內向欲十年俗阜人安中外無事高止黃屋吐故納新軍國之謀委以林甫卿謂如何高公頓首曰臣自二十年已後陛下頻賜臣酒往往過度便染風疾言辭倒錯進趨無恆十年以來不敢言事陛下不遺鄙賤言訪芻蕘縱欲上陳無裨聖造然所聞所見敢不竭誠且林甫用變造之謀仙客建和糴之策足堪救弊未可長行恐變正倉盡卽義倉盡正義俱盡國無旬月之蓄人懷饑饉之憂和糴不停卽四方之利不出公門天下之人盡無

私蓄棄本逐末其違乎哉但順動以時不逾古制征稅有典自合恆規則人不告勞物無虛費軍國之柄未可假人威權之聲振於中外得失之議誰敢興言伏惟陛下圖之上乃言曰卿十年以來不多言事今所敷奏未會朕心乃頓首曰臣生於邊方之國長自昇平之代一承恩渥三十餘年嘗願粉骨碎身以裨元化竭誠盡節上答皇慈頃緣風疾所侵遂使言辭舛謬今所塵黷不稱天心合當萬死頓首頓首上曰朕與卿休戚共同何須憂慮命左右曰卽置酒爲樂無使懷憂左右皆稱萬歲從此便住內宅不接人事及開元之末天寶之初陳希烈上元元之尊田同秀獻寶符之瑞貴妃受寵外戚承恩羅吉張俞興黨錮之獄楊裴韋秀李受無狀之誅五六年間道路以目祿山之禍自此興焉至十年上又言曰朕年事漸高心力有限朝廷細務委以宰臣藩戎不襲付之邊將自然無事日益寬閑卿謂如何高公曰比在內宅不知時議近於閤門外見諸道奏事人說雲南頻有喪律陛下何以禦之北兵近甚精強陛下何以制之但以皇威遠震聖澤傍流足以吞食鯨鯢剪滅封豕諸餘纖介曾何足云臣恐久無備於不虞卒有成於滋蔓然後禁止不亦難乎上曰卿之所疾漸亦痊除今日奏陳雅符朕意近小有疑慮所以問卿卿慎勿言杜後泄露應須方便然可改張高公頓首

謝曰以陛下至聖微臣至愚幸契天心不勝欣慶其後楊李爭權競相傾奪王邢不軌咸就誅夷十二年冬林甫云亡國忠作相先酬宿憾林甫被斲棺之刑靈俟後圖國忠播宣淫之恥十三年秋大雨晝夜六十日陳希烈罷相韋見素持衡上因左右無人謂高公曰自天寶十年之後朕素有疑果致天譴今希烈罷相韋陳改轍楊李殊塗終未通朕懷卿總無言何以爲意高公伏奏曰開元二十年已前宰臣授職不敢失墜邊將承恩更相戮力自陛下威權假於宰相法令不行災眚備於歲時陰陽失度縱爲輪慮難以獲安臣不敢言良有以也上久而不答十四年冬安祿山作逆起自范陽私聚甲兵假稱朝貢囚李芝於真定劫光嗣於太原長驅兩河將吞九鼎鼂爾戎羯乘我不虞國家久致昇平不修兵甲卒徵烏合之衆以禦必死之軍遂使張介然喪律於陳留封常清棄甲於汜水東京已陷西土猶寧有詔斬封高於驛前鎮哥舒於關上交鋒縱鎬向歷半年斬將擐旗不逾信宿兵疲師老衆潰親離國忠促哥舒之軍務令速進大拔冀祿山之黨更却先投烽火遍照於川原羽書交馳於道路西京于焉失守萬姓及此騷然十五載六月十二日有詔移仗未央宮十三日有詔幸巴蜀至延秋門外上駐馬謂高公曰卿往日之言是今日之事朕之曆數尙亦有餘不須憂懼扈

從至馬嵬山百姓驚惶六軍奮怒國忠方進咸卽誅夷號國太真一時連坐肅宗減隨駕兵馬復至咸陽未振軍容師徙小却長驅卒乘北至朔方七日萬人勸進讓不獲已乃卽皇帝位於靈武八月尊太上皇於成都改元爲至德元年成都宣赦上皇謂高公曰我兒嗣位應天順人改元至德孝乎惟孝卿之與朕亦有何憂高公伏奏曰陛下躬親庶務子育黔黎四十餘年天下無事一朝兩京失守萬姓流亡西蜀朔方皆爲警蹕之地河南漢北盡爲征戰之場天下之臣莫不增痛陛下謂臣曰卿之與朕復何憂哉臣未敢奉詔臣聞主憂臣辱主辱臣死死辱之義職臣之由臣不孝不忠尙存餘喘親蒙曉諭戰懼惟深初上過利州西臨蜀郡往來表疏道路相望知兩京有尅復之期兆人佇來蘇之慶仍皇情未暢臣下多虞及出劍門到巴蜀井邑氣候風雲與中國而頗殊對偏方而增恨應霑扈從皆同此心賴節度使崔圓以忠懇至誠恐皇恩軫慮凡所進奉不越時宜應修殿宇不勦人力上爲之悅左右皆稱萬歲上曰崔圓可謂大臣歟卽日拜相西南之俗無不欣然後崔相欲赴行在未測聖情上覺其憂懼謂高公曰朕觀崔圓器宇冲邃理識弘通比諸宰臣無出其右若得對見必倍承恩後果如上言且蜀中風土有異中原秋熱冬溫晝晴夜雨事之常也及駕出劍門到巴

蜀氣候都變不異兩京九月十九日霜風振厲朝見之時皆有寒色詔卽令著袍至二十一日百官盡衣袍立朝不依舊式每奏事人來往兩京動靜無不盡知二年正月祿山爲子慶緒所殺慶緒僞立兇謀逆計主以嚴莊僞勅僞書出於高尙但置酒爲樂餘無所圖上謂高公曰皇帝久在鳳翔兵威大震兇徒逆黨卽應殄滅高公伏奏曰逆賊背天地之恩恣豺狼之性更相魚肉其可久乎九月皇帝在鳳翔元帥廣平王中書令郭子儀驅百萬之熊羆吞二京之蚊蚋不逾旬月收復兩都慶緒北走於鄴中王師續圍於城下至乾元元年慶緒爲逆賊史思明所殺王師失利再陷洛陽李光弼作鎮於河陽郭英乂次安於虢路上元元年爲子朝義所殺至寶應元年下收洛陽朝義奔走不知所在上皇謂高公曰安史二逆賊父子相次伏誅豈非天地神明之所殛罰也高公曰皇帝聖化變及無窮陛下仁德福流萬葉凡是兇醜自合誅夷不勝慶快之至初至德二年十一月詔迎太上皇於西蜀十二月至鳳翔被賊臣李輔國詔外隨駕甲仗上皇曰臨至王城何用此物悉令收付所由欲至城皇帝具儀仗出城迎候二聖相見泣涕久之傾城士庶一時忭舞便於興慶宮安置乾元元年冬上皇幸溫泉宮二十日却歸因此被賊臣李輔國陰謀不軌欲令猜阻更樹勳庸移仗之端莫

不由此輔國趨馳末品小了織人一承攀附之恩致位雲霄之上聖上屬殘孽未殄蒼生不安貪總軍戎冀清海內不暇擇揀左右屏棄回邪遂使輔國熒惑兩宮至傷萬姓恣行威福不懼典刑上元元年七月太上皇移仗西內安置高公竄謫巫州皆輔國之計也上皇在興慶宮先留廐馬三百疋欲移仗前一日輔國矯詔索所留馬惟留十疋有司奏陳上皇謂高公曰常用輔國之謀我兒不得終孝道明早向北內及曉至北內皇帝使人起拜云兩日來疹病不復親起拜伏願且留喫飲飯畢又曰伏願且歸南內行欲至夾城忽聞憂聲上驚廻顧見輔國領鐵騎數百人便逼近御馬輔國便持御馬高公驚下爭持曰縱有他變須存禮義何得驚御輔國叱曰老翁大不解事且去卽斬高公從者一人高公卽攏御馬直至西內安置自辰及酉然後老宮婢十數人將隨身衣物至一時號泣上皇止之皆輔國矯詔之所爲也上皇謂高公曰興慶宮是吾王地吾頻讓與皇帝皇帝仁孝不受今雖爲輔國所制正愜我本懷進御人令撤肉便處分尙食明日已後不須進肉食每日上皇與高公親看掃除庭院芟薙草木或講經論議轉變說話雖不近文律終冀悅聖情經十餘日高公患瘡勅於功臣閣下避瘡日晚聞門外有人問稱是啖庭瑤云聖人喚阿翁問曾見太上皇未曰見了

高公亦不敢辭卽隨庭瑤至閣門外日晚見內養將一卷文書狀云使看略見少多皆是罷職却被
索將附奏云臣合死已久聖恩含忍容至今日所看事狀並不曾聞願得親辭聖顏然後受戮死亦
無恨明日有制力士潛通逆黨曲附兇徒旣懷梟獍之心合就鯨鯢之戮以其久侍帷幄頗效勤勞
且捨殊死可除名長流巫州九月三十日至巫州隨身手力不越十人所餘衣糧纔至數月殷憂待
罪首尾三年經一年忽見本道觀察第五國珍謫至夷州與第五相飲賦詩曰煙燼眼落膜瘴染面
朱虞謂同病曰宰相猶如此餘何以堪左右聞之皆爲揮涕又於園中見薺菜土人不解喫便賦詩
曰兩京秤斤買五溪無人採裔夏雖有殊氣味應不改使拾之爲羹甚美或登山臨水以永終日至
元年建辰月有制流人一切放還至建巳月二聖昇遐今上卽位改元爲寶應元年六月巫州二聖
遺詔到號天叩地悲不自勝制服持喪禮過常度每一號慟數迴氣絕晝夜無時傷感行路恨不得
親奉陵寢而使永隔幽明哀毀旣深哽咽成疾七月發巫山至朗州八月病漸亟謂左右曰吾年已
七十九可謂壽矣官至開府儀同可謂貴矣旣貴且壽死何恨焉所恨者二聖昇遐攀號不迨孤魂
旅櫬飄泊何依泣下霑襟視之盡血言畢以寶應元年八月十八日終於朗州開元寺之西院遠近

聞之莫不傷歎九月靈櫬發朗州十一月至襄州有詔令復舊官爵追贈廣州都督喪事行李一切
官給陪葬元宗陵高公所生母麥氏卽隋將鐵杖曾孫始與母別時年十歲母撫其首泣曰與汝分
別再見無時然汝胸上七黑子他人云必貴我若不死得重見記取此言汝常弄吾臂上雙金環吾
亦留看待見汝伺之慎勿忘却卽與決別向三十年後知母在灋州雖使人迎候終不敢望見及到
子母並不相識母問曰與汝別時語記否胸前有黑子母曰在否卽解衣視之母亦出金環示之一
時號泣累日不止上聞登時召見封越國夫人便於養父母家安置十餘年後卒葬東京原燕公誌
墓曰驗七黑於子心辨雙環於母臂卽此事也其妻東平呂氏故岐州刺史元悟之女躬行婦道有
逾常禮大理司直太原郭湜曰李輔國謬承恩寵竊弄威權蒙蔽聖聰恣行兇醜所持刑憲皆涉回
邪卽有敬毛裴畢之流起周代索丘之獄旣無所措難以圖存使天下之心自然搖矣但經推案先
沒家貲不死則流動逾千計黔中一道尤多則三故相裴冕張鎬第五琦是也一大夫賀蘭進明是
也六中丞鄭叔清暢濯韋利見皇甫銳張萬頃毛若虛是也七御史李融屈無易孫昌引孫瑩宋晦
嚴銳畢曜是也三員外張渭張之緒李宣是也一左丞皇甫銑是也一郡王瑀是也一開府力士是

也遣評補博卿監司舍將軍列卿州牧縣宰已下散在諸郡不可盡紀從至德至寶應向二千人及承恩放還十二三矣嗟乎淫刑以逞誰得無罪滄同病者報以誌之況與高公俱嬰譴累每接言論敢不書紳豈謂懷輔弼之元勳當休明之聖代卒爲讒佞所惡生死銜冤悲夫

李輔國

按唐書宦者傳輔國本名靜忠以閹奴爲閑廐小兒貌儇陋略通書計事高力士年四十餘使主廐中簿最王鉞爲使以典禾豆能檢撙耗欺馬以故肥薦之皇太子得侍東宮陳元禮等誅楊國忠輔國豫謀又勸太子分中軍趨朔方收河隴兵圖興復太子至靈武愈親近勸遂卽位係天下心擢家令判元帥府行軍司馬肅宗稍稍任以肱膂事更名護國又改今名凡四方章奏軍符禁寶一委之輔國能隨事齟齬謹密取人主親信而內深賊未敢肆不啖葷時時爲浮屠詭行人以爲柔良不忌也帝還京師拜殿中監閑廐五坊宮苑營田栽接總監使兼隴右羣牧京畿鑄錢長春宮等使少府殿中二監封成國公實封戶五百宰相羣臣欲不時見天子皆因輔國以請乃得可常止銀臺門決事置察事廳兒數十人吏雖有秋毫過無不得得輒推訊州縣獄訟三司制劾有所捕逮流降皆私

判臆處因稱制勅然未始聞上也詔書下輔國署已乃施行羣臣無敢議出則介士三百人爲衛貴幸至不敢斥官呼五郎李揆當國以子姓事之號五父帝爲娶元擢女爲妻擢以故爲梁州長史弟兄皆位臺省李峴輔政叩頭言且亂國於是詔勅不繇中書出者峴必審覆輔國不悅時太上皇居興慶宮帝自複道來起居太上皇亦間至大明宮或相逢道中帝命陳元禮高力士王承恩魏悅玉眞公主常在太上皇左右梨園弟子日奏聲伎爲娛樂輔國素微賤雖曩貴力士等猶不爲禮怨之欲立奇功自固初太上皇每置酒長慶樓南俯大道因裴回觀覽或父老過之皆拜舞乃去上元中劍南奏事吏過樓下因上謁太上皇賜之酒詔公主及如仙媛主之又召郭英乂王鉞等飲資予頗厚輔國因妄言於帝曰太上皇居近市交通外人元禮力士等將不利陛下大軍功臣反側不自安願徙太上皇入禁中帝不寤先時興慶宮有馬三百輔國矯詔取之裁留十馬太上皇謂力士曰吾兒用輔國謀不得終孝矣會帝屬疾輔國卽詐言皇帝請太上皇按行宮中至睿武門射生官五百遮道太上皇驚幾墜馬問何爲者輔國以甲騎數十馳奏曰陛下以興慶宮湫陋奉迎乘輿還宮中力士厲聲曰五十年太平天子輔國欲何事叱使下馬輔國失轡罵力士曰翁不解事斬一從者力